



La squadra musicala da l’opera Uorsin va a festager Chalandamarz. A dretta as vezza a Gianna Lunardi scu mamma ed a Chasper-Curò Mani scu bap.

FOTOS MARTIN CAMICHEL

Ün Chalandamarz immez la sted

In venderdi es que uschè inavaunt e la versiun rumauntscha da l’opera Uorsin festagia sia premiera sül plaizza da scuola a Zuoz. Cun sustegn da 15 iffaunts engiadinais, chantaduors dal muond rumauntsch scu eir da musicists professiunels da la Camerata Puntraschigna vo l’opera – chi raquinta l’istorgia da l’Uorsin da la s-chella e da Flurina – zieva sün turnea tres tuot l’Engiadina.

MARTIN CAMICHEL/FMR

L’istorgia da l’Uorsin – chi’d es gnida publicheda dal 1945 – accompagna già daspö 80 ans a diversas generaziuns tres lur infanzia e que surour ils cunfins dal Grischun. Sper Heidi tucharo l’Uorsin tals protagonistis d’istorgias d’iffaunts ils pü cuntschaints da la Svizra – dimena ün vair export engiadinais, quist Uorsin.

Zieva cha’d es gnieu realiso avauant var desch ans ün film da kino davart quist «pü famus Engiadinais», es dal 2019 eir gnida cumponüda ün’opera chi tratta da l’Uorsin. L’opera es gnida scritta per tudas-ch dal cumponist *Marius Felix Lange* da Berlin per incumbenza dal Teater Basilea. Il libret tratta il cuntgnieu dals trais cudeschs da Selina Chönz davart Uorsin e Flurina. E quista sted riva quista opera cun musica contemporanea in üna versiun rumauntscha – tradüta da la Lia Rumantscha – per la prüma vouta sün divers pals in Engiadina e Bregaglia.

L’opera tuocha in Engiadina

«Per me d’eira que important cha quist’opera vegna rapreschanteda cò in Engiadina, inua ch’ella tuocha eir – e que natürelmaing per rumauntsch e cun sustegn d’Engiadinais e d’Engiadinais», disch *Claudio Danuser*, l’intendant da l’Opera Engiadina. El agiundscha cha que nu füss uschigliö sto pussibel da realiser il proget per rumauntsch, causa las sfidas in connex cun la lingua. Perque hegia druvo indigens ed indigenas per l’opera. Uschè ho l’intendant eir svelt banduno l’ideja da forsa realiser l’opera cun ingascher chantaduors dals Zürcher Sängerknaben e da las cantorias da Basilea e Lucerna.

Ma da chatter a la fin chantaduras e chantaduors giuvens per las rollas saja listess sto üna vaira sfida. «Taunt pü furütüns e cuntaints essans d’avair chatto culs fradgliuns *Jöri* e *Luisa Würms* da Puntraschigna e las duos scolaras da chaunt da *Nina Mayer* – nempe ad *Ambra Fanchi* e *Chiara Staub* da Sent – ifaunts chi’d haun surpigliu las rollas principelas.» Las chantaduras e’ls chantaduors giuvens sun gnies tscherchos in möd d’ün casting düraunt l’an passo e daspö il schner 2025 es Claudio Danuser vi dal trener per la granda premiera. Uschè as partecipschan 15 iffaunts da tuot l’Engiadina al proget



Jöri Würms da Puntraschigna es l’Uorsin illa versiun putera da l’opera.



Il chantadur Flurin Caduff giova e chaunta güsta duos rollas, nempe quella dal barba Gian e – scu da vzair cò sülla fotografia – quella da l’inviern persunificho.

d’opera. Per duos rollas principelas – l’Uorsin e la Flurina – do que adüna üna occupaziun dopla ed uschè chauntan els in Engiadina Ota per puter ed in Engiadina Bassa per vallader.

Üna sfida pels iffaunts – impustüt la musica

«Siand cha que’s tratta da musica contemporanea, nu sun las melodias adüna uschè cleras ed inclegiantaivlas pels ifaunts. Que es sto al principi üna sfida, ma els haun propi impris bain e faun üna fich buna lavur», declera Claudio Danuser. Sustgnieu vain la squadra musicala giuvna da la Camerata Puntraschigna scu eir da duos chantaduors ed üna chantadura dal muond rumauntsch. Uschè surpiglia *Chasper-Curò Mani* la rolla dal bap e *Gianna Lunardi* la rolla da la mamma. Il chantadur sursilvan *Flurin Caduff* as vezza ed oda güsta in duos rollas, nempe quella dal barba Gian – il quel scumparta las s-chellas – scu eir la rolla da l’inviern persunificho. Per la redschia e l’inscenaziun es respunsabla la zuozingra *Riikka Läser*, la quela es üna dad och personas chi’d ho survgnieu il Premi d’arcugnuschentscha dal chantun Grischun quist an.

Sustegn da famiglias e cumponist

Tenor Claudio Danuser sustegnan eir las famiglias *Könz* e *Carigiet* il proget ed haun perque scrit ün salüd illa revista da program. Ma eir il cumponist Marius Felix Lange hegia ün grand plaschair cha sia opera vegna finelmaing rapreschanteda illa patria da l’Uorsin. E perque ho Claudio Danuser eir survgnieu il permiss dal cumponist da pudair adatter l’üna u l’otra passascha per la render pü facil pels iffaunts. «Ed impustüt esa per me il non plus ultra da pudair traunter oter rapreschanter l’opera a Zuoz scu eir a Guarda – nempe i’ls duos hotspots dal Chalandamarz», disch Claudio Danuser ed agiundscha: «Süllas plazzas regna ün’atmosfera ed ambiente optimel per l’ouvra – ed eau m’allegri per la rapreschanter finelmaing davaunt ün public.»

Ed uschè tuorna l’Uorsin quist venderdi saira sün plaizza da scuola a Zuoz. E que cun blusas blovas, ils fazöls cotschens, üna pruna s-chellas e pissera pel prubabelmaing prüm Chalandamarz düraunt la sted.

Zieva la premiera da l’opera Uorsin als 13 gün 2025 sül plaizza da scuola a Zuoz, vo quella sün turnea e fo auncha üna fermada a Ftan, San Murezzan, Guarda, Bergaglia, Puntraschigna ed a Segl. Ulteriuras infurmaziuns e bigliets as survain sün www.operaengiadina.ch.

SCUOL

Müdamaints al timun da la Gurlaina SA

Pella presidenta partenta Leta à Porta es gnü elet Dario Giovanoli.

In occasiun da la radunanza generala da gövgia passada ha la presidenta *Leta à Porta* pudü preschantar ün rendaint allegraivel. Cun ün schmerdsch da 375 100 francs ed ün guadogn da 7429 francs es l’on da gestiun stat ün bun on – impustüt eir grazcha a las entradas in connex cun Scuol Classics. Quai demuossa tenor la presidenta, cha grondas occurrenzas sco l’EBexpo e Scuol Classics sun importantas pella halla e cha la regiun po profitar da l’infrastructura existenta per insomma pudair organisar tals eveniments. Davo blers ons cha la società ha stüvu portar avant ün deficit esa stat pussibel cul resultat positiv da l’on passà da rivar finalmaing illas cifras nairas.

In seis rapport annual ha la presidenta ingrazchè als cumüns da la regiun, chi sustegnan la halla cun üna contribuziun generusa, ma eir al Club da hockey Engiadina sco fittadin principal. Impü sun eir las entradas dals differents chomps da trenamaint dürant la stà ün’entrada importanta. Las tractandas ordinarias han pudü gnir evasas sainza gronds intops.



Leta à Porta e Cla Riatsch sun stats tuts duos passa 20 ons i’l cussagl administrativ da la Gurlaina SA.

FOTO MAD/PL

Leta à Porta ha demischionà

Il tema il plü important d’eira però il müdamaint al timun da la società Gurlaina SA. La presidenta Leta à Porta chi’d es statta 20 ons aint il cussagl administrativ e daspö desch ons presidenta dal gremi, ha demischionà sia carica. Al medem mumaint as ha eir retrat il vice-president *Cla Riatsch* dal cussagl administrativ, davo ch’el d’eira pro passa 20 ons ed es stat da seis temp ün dals fundaturs da la società.

Nouv i’l cussagl administrativ sun gnüts tschernüts *Roman Florinett* da Scuol e *Marco Täisch* dad Ardez. Confermà sco commember dal cussagl administrativ es gnü *Ruedi Haller* sco rapreschantant dal Club da hockey Engiadina. Sco nouv president ha il cussagl administrativ davopro elet a *Dario Giovanoli* da Scuol e sco vice-president ad *Armon Kirchen* da Valsot. (cdm/pl)

CONCERT

Cun fö musical illa baselgia da Sent



L’ensemble Con Fuoco pro seis ultim concert illa baselgia a Sent.

FOTO JANINE HAERLE

Il concert da Tschinquaisma illa baselgia da Sent da l’ensemble da giuvenils e giuvenilas Con Fuoco chi ha inchantà a l’auditori. El es stat ün cumgià ed ün cumanzamaint in üna. Davo 15 ons ha l’ensemble Con Fuoco suot la bachetta da *Verena Zeller* dat seis ultim concert. Pro quel concert ha *Mischa Weiss* muossà ch’el es ün pitschen maister sün seis instrumaint: In pled e musica ha’l muossà seis svilup: In quell’ocasiun ha’l inaugurà cun schlantsch e paschiun sia nouva marimba. Cun «furmias aint il chül» da *Domenic Janett* han Con Fuoco conclü il concert.

Regula Ursprung